



**Sumáriu Kazu
Tribunál Judisiál Primeria Instánsia Dili
Outubru 2023**

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la representa JSMP nia hanoin hanesan instituisaun ida. JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Judisiál Primeira Instánsia Dili

1. Totál kazu ne'ebé JSMP monitoriza :13

Artigu	Tipu kazu	Númeru
Artigu 145 KP	Ofensa ba integridade fízika simples ho natureza violénsia doméstika konjuga ho artigu 2, 3, 35(b) no 36 LKVD.	9
Artigu 154 KP no artigu 157 KP	Maus- tratus ba kónjuje no ameasa	1
Artigu 258 KP	Danu simples	1
Artigu 252 KP	Furtu agravadu	1
Artigu 243 KP	Obstrusaun ba autoridade pública	1
Totál		13

2. Totál desizaun ne'ebé JSMP monitoriza: 9

Tipu pena	Artigu	Númeru
Pena multa	Artigu 67 KP	4
Suspensaun ba prizaun nia ezekusaun	Artigu 68 KP	2
Pena admoestasaun	Artigu 82 KP	2
Absolve		1
Totál		9

3. Totál kazu sira ne'ebé adia tuir JSMP nia monitorizasaun:0

4. Totál kazu sira ne'ebé sei kontinua prosesu tuir JSMP nia monitorizasaun :4

1. Krime ofensa ba integridade física simples ho natureza violénsia doméstika

Nú. Prosesu : 0075/22.DINFT
Kompozisaun Tribunál : Singulár
Juis : Dra. Ana Paula Fonseca
Prokuradór : Dr. Napolião Soares da Silva
Defeza : Dr. José Maria Guterres
Desizaun : Pena multa US\$45.00

Iha 03 Outubru 2023, Tribunál Judisiál Primeira Instánsia Díli prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu NJMDR hasoru nia feen, iha Munisípiu Dili.

Akuzasaun prokuradór

Prokuradór akuza katak iha 24 Abril 2022, iha oras tuku 20:00 kalan, arguidu tuku dala ida ho maka'as iha lezada nia matan laran parte loos, rezulta moras, bubu mean no metan iha matan okos no matan laran. Antes agresaun ne'e, arguidu ho lezada diskute malu kona-ba arguidu diskonfia lezada amante (*selingkuh*).

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu sira 2, 3 (a), 35 no 36 LKVD.

Produsaun ba prova sira

Iha julgamentu, arguidu konfesa integralmente ba faktu hotu iha akuzasaun no deklara katak foin primeiravés mai hatan iha tribunál, arrepende nia hahalok no deklara katak depoisde akontesimentu ne'e, arguidu tenta husu deskulpa ba lezada no lezada mak lakohi ona atu moris hamutuk ho arguidu.

Alende ne'e, lezada kontinua konfirma faktu hotu iha akuzasaun no deklara katak seidak di'ak malu, arguidu ho lezada desidi ho akordu husi lia na'in atu moris separa no haree deit labarik.

Alegasaun finál

Prokurador konsidera arguidu provadu komete krime hasoru lezada, bazeia ba konfiseaun arguidu nian no konfirma mós husi lezada no lezada mós lakohi atu moris hamutuk ona ho arguidu, nune'e husu ba tribunál atu kondena arguidu ho pena multa.

Entretantu defeza husu bá tribunál atu kondena arguidu ho pena ne'ebé justu ho konsiderasaun katak arguidu konfesa, arrepende nia hahalok no promete sei la komete tan krime seluk iha futuro.

Desizaun

Depoisde avalia faktu hotu tribunál konsidera faktu hotu provadu, bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende nia hahalok no promete sei la komete tan krime hanesan iha futuro. Ho nune'e tribunál konklui prosesu ne'e no kondena arguidu ho pena multa US\$45.00, ne'ebé arguidu sei selu US\$1.00 kada loron durante loron 45. Tribunál mós fiksa pena alternative durante loron 40 prizaun, bainhira arguidu la kumpri pena multa refere.

2. Krime danu simples

Nú. Prosesu: : 0055/23.PDDIL
Kompozisaun Tribunál : Singulár
Juis : Dra. Maria Solana
Prokuradór : Dr. Osorio de Deus

Defeza : Dr. Joana Cristina Pinto
Desizaun : Pena multa US\$75.00

Iha 04 Outubru 2023, Tribunál Judisiál Primeira Instánsia Dili prezide julgamentu leitura sentensa ba krime danu simples ne'ebé envolve arguidu Pedro Cardozso hasoru lezadu Virgilio da Silva Cruz, iha Munisípiu Dili.

Akuzasaun Prokuradór

Prokuradór akuza katak iha lezadu nia kintal ne'ebé lokaliza iha Aldeia moris ba dame, Suku Bairro Pite, Postu Administrativu Dom Aleixo, Munisípiu Dili, dokumentu kona-ba rai ne'e tau lezadu nia aman nia naran João da Cruz, iha tempu okupasaun Indonezia lezadu ho nia aman uza kintal refere hodi halo to'os, nune'e iha tinan 1996, lezadu kuda hela ai-teka iha nia baliza ne'ebé tama ba iha nia kintal laran no ai-teka kuda kuaze tinan rua nolu resin hitu. Iha loron ne'ebé la apuradu, maibé iha tinan 2018, lezadu fó ona avizu ba arguidu katak ai-teka ne'e labele tesi no iha tempu ne'eba arguidu hatan ba lezadu katak *"hau la tesi ida, hau hamos de'it para hodi sai hanesan ai mahon"*. Maibé iha fulan Janeiru 2023, nia laran arguidu tesi tiha ai-teka refere sein koñesimentu husi lezadu, katak ai-teka nia hun ida kuandu fa'an ne'e nia valor bele hetan to'o US\$250.00 iha valor ne'e lezadu kalkula ona tuir esperensia ema sira ne'ebé fa'an ai-teka.

Prokuradór akuza arguidu kontra artigu 258 Nú 1. KP kona-ba danu simples ho moldura penal too tinan 3 ka multa.

Produsaun ba prova sira

Iha prosesu julgamentu, arguidu deklarata katak faktu balun loos no balun la loos, ida la loos maka lezadu iha nia kintal rasik hodi kuda ai-teka ne'e, tuir arguidu nia hatene katak rai ne'e Sr. Cristovão da Silva nia no desde tinan 2017, arguidu ba hela iha fatin ne'e ai-teka sira ne'e sei ki'ik hela, no iha tinan 2023, fulan Janeiru arguidu tesi ai-teka ne'e ho razaun katak ai-teka nia sanak balun taka ona arguidu nia uma no iha parte seluk bainhira anin hu maka'as bele ameasa arguidu nia uma tanba ne'e maka arguidu tesi.

Alende ne'e lezadu konfirma katak ai-teka ne'e lezadu mak kuda duni desde okupasaun Indonézia nian iha tinan 1996, nia laran antes arguidu tesi ai-teka ne'e lezadu fó hatene hela ba arguidu katak ai-teka ne'e labele tesi, no iha tempu ne'eba arguidu hatan ba lezadu katak *"hau la tesi ida, hau hamos de'it para hodi sai hanesan ai mahon"* maibé ikus mai arguidu tesi sein koñesimentu husi lezadu.

Entretantu testemuña depoimenta katak ai-teka ne'ebé arguidu tesi ne'e lezadu mak kuda duni desde tinan 1996, iha momentu ne'eba testemuña sei iha Eskola Pre-sekundaria, 3 klase, no ai-teka ne'ebé arguidu tesi ne'e lezadu la ba foti no husik hela iha ne'eba, arguidu mak uza hotu.

Alegasaun finál

Prokuradór haktuir katak arguidu ninia aktu ne'e provadu hotu, maske arguidu nega faktu balun katak kintal ne'e laos lezadu nian maibé deklarasaun husi lezadu nian no testemuña hateten katak kintal ne'e lezadu nian duni no ai-teka ne'ebé lezadu kuda ne'e desde okupasaun Indonézia nian iha tinan 1996 nia laran no ai-teka nia idade ne'e agora kompleta ona tinan ruanulu resin hitu, no ai-teka ne'ebé lezadu kuda ne'e fó hatene antes ona ba arguidu katak labele tesi ai-teka, maibé ikus mai arguidu tesi sein koñesimentu husi lezadu, tan ne'e maka husu ba tribunál kondena arguidu ho pena multa US\$200.00.

Entretantu defeza haktuir katak ai-teka ne'e fó ameasa duni ba arguidu nia uma tanba nia sanak balun taka ona ba arguidu nia uma ho nune'e anin hu maka'as ne'e bele tohar no prezudika ba arguidu nia uma ho razaun ida ne'e maka arguidu tesi, ho nune'e husu ba tribunál fó pena justu no adekuaudu ba arguidu.

Desizaun

Depoisde avalia faktu hotu tribunál prova katak ai-teka ne'ebé arguidu tesi ne'e lezadu nian duni, ho razaun arguidu tesi ai-teka ne'e tanba ai-teka nia sanak balun fó ameasa ba arguidu nia uma ho nune'e maka arguidu tesi maibé sein koñesimentu husi lezadu no ai-teka sira ne'ebé arguidu tesi ne'e arguidu maka uza hotu.

Bazeia ba faktu provadu sira ne'e tribunál konklui prosesu ne'e no kondena arguidu ho pena multa US\$75.00 ne'ebé kada loron arguidu sei selu US\$1.00 durante loron 75. Tribunál mós fiksa pena alternativa durante loron 60 prizaun, bainhira arguidu la kumpri pena multa refere.

3. Krime ofensa ba integridade fízika simples ho natureza violénsia doméstika

Nú. Prosesu	: 0317/23. DICMR
Kompozisaun Tribunál	: Singulár
Juis	: Dr. Afonso Carmona
Prokuradór	: Dr. Napolião Soares da Silva
Defeza	: Dr. Marcelo da Roza (Advogado Privadu)
Desizaun	: Pena multa US\$45.00

Iha 05 Outubru 2023, Tribunál Judisiál Primeira Instánsia Dili prezide leitura sentesa ba krime ofensa ba integridade fízika simples ho natureza violénsia doméstika ne'ebé envolve arguidu TM hasoru nia feen, iha Munisípiu Dili.

Akuzasaun Prokuradór

Prokuradór akuza katak iha 21 Maiu 2023, iha oras 17:40 lokraik, arguidu foti xikra ki'ik ida hodi tuda kona iha lezada nia ulun, konsekuensia hosi arguidu nia hahalok ne'e lezada hetan kanek nakles no raan sai barak. Kazu ne'e akontese bainhira arguidu hemu tua ho nia kolega sira fila mai uma ho kondisaun lanu, arguidu nia oan feto halimar hela derepente monu, arguidu hakat ba kous nia oan, lezada mai ho hirus no husu ba arguidu "nusa mak labarik monu no ba fatin ruma mai ho lanu, viziñu hatene sente la moe ga no lezada komesaibun-ibun ba arguidu" ho nune'e mosu agresaun ne'e.

Prokuradór akuza arguidu kontra artigu 145 Nú 1 KP kona-ba krime ofensa ba integridade fízika simples konjuga ho artigu 2 3(a), 35 b no 36 LKVD ho moldura penal too tinan 3 ka multa.

Produsaun ba prova sira

Iha prosesu julgamentu arguidu konfesa integralmente ba faktu hotu iha akuzasaun, arrepende nia hahalok, diak malu ona ho lezada no promete sei la komete tan krime hanesan iha futuro. Alende ne'e lezada konfirma faktu hotu iha akuzasaun no deklara katak diak malu ona ho arguidu.

Alegasaun finál

Prokuradór haktuir katak arguidu provadu komete krime hasoru lezada, bazeia ba konfisaun arguidu nian no konfirma mós husi lezada, nune'e husu ba tribunál atu kondena arguidu ho pena multa.

Enkuantu defeza husu ba tribunál atu kondena arguidu ho pena ne'ebé justu ho konsiderasaun katak arguidu konfesa, arrepende nia hahalok, diak malu ona ho lezada no promete sei la komete tan krime hanesan iha futuru.

Desizaun

Depoisde avalia faktu hotu tribunál konsidera arguidu provadu komete krime hasoru lezada, bazeia ba faktu provadu hirak ne'e no tetu mós ho sirkunstánsia atenuante sira ne'ebé haleu krime ne'e, nune'e tribunál konklui prosesu ne'e no kondena arguidu ho pena multa US\$45.00, ne'ebé kada loron arguidu sei selu 0,50 sentavus durante loron 90. Tribunál mós fiksa pena alternativa durante loron 60 prizaun, bainhira arguidu la kumpri pena multa refere.

4. Krime ofensa ba integridade fízika simples ho natureza violénsia doméstika

Nu. Prosesu : 0561/22.DICMR
Kompozisaun Tribunál : Singulár
Juis : Dra. Albertina Neves
Prokuradora : Dra. Ivonia Maria Guterres
Defesa : Dr. José Guterres
Desizaun : Pena prizaun fulan 3 suspende ba tinan 1 fulan 6

Iha 06 Outubru 2023, Tribunál Judisiál Primeira instánsia Dili prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu MDSX hasoru nia feen, iha Munisípiu Dili.

Akuzasaun prokuradora

Prokuradora akuza katak iha 24 Novembru 2022, iha oras tuku 21:00 kalan, arguidu basa dala ida iha lezada nia hasan parte loos, rezulta bubu no moras, arguidu kontinua tuku dala ida iha lezada nia ulun parte loos no tebe dala ida iha lezada nia kotuk no basa dala ida iha lezada nia hasan parte loos. Antes agresaun ne'e, arguidu ho lezada diskute malu kona-ba lezada hateten ba arguidu katak "kalan boot ona ó lori labarik ba fali leten ne'ebá," no arguidu hatan katak "ó nia família sira kous labarik ba mai diak hela," lezada hatan ba arguidu katak iha ne'e ema kaer ai-moruk aat barak kalan boot ona labele lori labarik sai, nusa maka labarik moras lori sai fali, nune'e mosu agresaun ne'e.

Prokuradora akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu sira 2, 3 (a), 35 no 36 LKVD.

Produsaun ba prova sira

Iha julgamentu, arguidu konfesa integralmente ba faktu hotu iha akuzasaun no deklara katak foin primeirvés mai hatan iha tribunál, arrepende nia hahalok, diak malu ona ho lezada, husu ona deskulpa ba lezada no promete sei la komete tan iha futuru.

Alende ne'e, lezada kontinua konfirma faktu hotu iha akuzasaun no deklara katak arguidu laos foin primeirvés baku lezada iha tinan 2022, iha tinan 2021 lezada nia oan sei nurak arguidu tuku no basa lezada, maibé lezada la halo buat ida no iha 24 Novembru 2022, lezada foin halo keixa iha polísia no lezada ho arguidu mós di'ak malu ona no arrepende ona nia hahalok no promete sei la komete tan krime hanesan iha futuru.

Alegasaun finál

Prokuradora konsidera arguidu provadu komete krime hasoru lezada bazeia ba konfisaun arguidu nian, atu prevene krime hanesan akontese tan iha futuru husu ba tribunál atu kondena arguidu ho pena prizaun fulan 6 suspende ba tinan 3.

Entretantu defeza husu ba tribunál atu kondena arguidu ho pena ne'ebé justu ho konsiderasaun katak arguidu konfesa, arrepende nia hahalok, diak malu ona ho lezada no promete sei la komete tan krime hanesan iha futuru.

Desizaun

Depoisde avalia faktu hotu tribunál konsidera arguidu provadu komete krime hasoru lezada, bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende nia hahalok, diak malu ona ho lezada no promete sei la komete tan krime hanesan iha futuru. Ho nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida fulan neen.

5. Krime ofensa ba integridade fizika simples ho natureza violénsia doméstika

Nú. Prosesu : 0073/22.LILIQ
Kompozisaun Tribunál : Singulár
Juis : Dr. José Gonçalves
Prokuradora : Dra. Ivonia Maria da Costa Guterres
Defeza : Dr. Francisco Caetano
Desizaun : Pena multa US\$90.00

Iha 09 Outubru 2023, Tribunál Judisiál Primeira Instánsia Dili prezide leitura sentensa ba Krime ofensa ba integridade fizika simples ho natureza violénsia doméstika ne'ebé envolve arguidu JPS hasoru nia feen, iha Munisípiu Likisá.

Akuzasaun prokuradora

Prokuradora akuza katak iha 09 Novembru 2022, iha oras tuku 20:00 kalan, arguidu basa dala ida iha lezada nia hasan parte loos no basa dala ida iha lezada nia hasan parte karuk, buti lezada nia kakorok lezada sente moras no hakilar, la to'o iha ne'e de'it arguidu kontinua kaer lezada nia liman rua hodi silu ba kotuk no lori ai hodi baku dala barak iha lezada nia isin lolon tomak to'o ai ne'e mohu iha lezada nia isin. Antes agresauun ne'e, arguidu ho lezada diskute malu kona-ba lezada bolu arguidu atu kous sira nia oan ne'ebe tanis hela, atu lezada tein hahan kalan nian. Maibé arguidu lori fali ho fisga sai ba liur atu ba tiru niki. Depoisde arguidu fila mai uma, arguidu husu hahan kalan nian ba lezada maibé lezada hatan katak "ohin hau haruka o kous labarik para hau tein etu kalan nian, maibé ó lakohi ho nune'e hau la tein etu tanba labarik tanis hela de'it," ho nune'e mosu agresauun ne'e.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál too tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklarata katak depoisde akontesimentu ne'e lezada halai ba nia família sira durante loron lima no arguidu maka ba husu deskulpa ba lezada nia família no fó mós ho osan ho montante US\$250, Bir Bintang dos 1 no bibi aman ida, di'ak malu ona ho lezada no hela hamutuk nafatin, arrepende nia hahalok no promete sei la komete tan krime hanesan iha futuru.

Alende ne'e lezada konfirma faktu hotu iha akuzasaun no deklarata katak depoisde akontesimentu ne'e lezada ba lezada nia família sira hodi lori lezada ba ospital hodi halo tratamentu saúde no depoisde loron hat maka recupera fila-fali, agora daudaun di'ak malu ona no hela hamutuk ho arguidu no lezada mós konfirma ho arguidu ninia deklarasaun katak arguidu husu ona diskulpa no fó ona osan no sasan sira hanesan temi iha leten.

Alegasaun finál

Prokuradór konsidera hahalok arguidu nian priense duni elementu krime ofensa ba integridade fízika simples ho natureza violénsia doméstika hasoru lezada, bazeia ba konfisaun arguidu nian no konfirma mós husi lezada, tanba ne'e husu ba tribunál atu kondena arguidu ho pena prizaun tinan ida suspende ba tinan tolu.

Entretantu defeza husu ba tribunál atu kondena arguidu ho pena ne'ebé adekua no bele mós absolve, ho konsiderasaun katak arguidu konfesa, arrepende nia hahalok, di'ak malu ona ho lezada no promete sei la komete tan krime hanesan iha futuru.

Desizaun

Depoizde avalia faktu hotu tribunál prova katak arguidu komete duni krime hasoru lezada, bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende nia hahalok, di'ak malu ona ho lezada no promete sei la komete tan krime hanesan iha futuru. Ho nune'e tribunál konklui prosesu ne'e no kondena arguidu ho pena multa US\$90.00 ne'ebé arguidu sei selu US\$1.00 kada loron durante loron 90. Tribunál mós fiksa pena alternativa durante loron 60 prizaun, bainhira arguidu la kumpri pena multa refere.

6. Krime ofensa ba integridade fízika simples ho natureza violénsia doméstika

Nú. Prosesu : 0144/23 DICMR
Kompozisaun Tribunál : Singulár
Juis : Dra. Ana Paula Fonseca
Prokuradór : Dr. Napoleão da Silva Soares
Defeza : Dr. Manuel Amaral
Desizaun : Pena prizaun tinan 1 fulan 9 suspende ba tinan 2 no apresentasaun periódika kada fulan dala 1 durante tinan 1 iha tribunál.

Iha 20 Outubru 2023, Tribunál Judisiál Primeira Instánsia Dili prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu JSA hasoru nia feen, iha Munisípiu Dili.

Akuzasaun Prokuradór

Prokuradór akuza katak iha 08 Marsu 2023, iha oras tuku 17:00 lokraik, arguidu buti metin lezada nia kakorok riba ba parede hafoin rasta no riba ba iha kama leten, tuku dala barak iha lezada nia ulun, basa dala rua iha lezada nia hasan parte karuk hafoin riba lezada monu ba rai. Antes agresaun ne'e, arguidu ho lezada diskute malu kona-ba problema ne'e mosu tanba lezada husu osan US\$1.00 atu fó ba sira nia oan atu ba eskola mak arguidu hirus halo agresaun ba lezada. Konsekuénsia husi arguidu nia aktu refere rezulta lazada sofre moras. Antes ne'e arguidu baku ona lezada, ida ne'e hamutuk ba dala haat ona no lezada hato'o keixa dala rua nomós tuir ona julgamentu iha tribunál.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penal to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu hili ninia direitu nonook. Enkuantu lezada konfirma faktu sira iha akuzasaun no deklara katak akontesimentu iha tuku 07:00 dadeer, arguidu toba hela lezada husu osan US\$1.00 ba arguidu atu sosa matabisu ba sira nia oan lori ba eskola, maibé arguidu tolok lezada nune'e mosu dikusaun mak arguidu halo agresaun hasoru lezada.

Alegasaun finál

Prokuradór haktuir katak mezmu arguidu hili ninia direitu nonook maibé lezada konfirma faktu sira iha akuzasaun, nune'e prokuradór konsidera arguidu nia aktu ne'e priense duni rekezitu krime ofensa ba integridade fízika simple ho natureza violénsia doméstika no prokuradór husu ba tribunál atu kondena arguidu ho pena prizaun tinan 1 fulan 6 prizaun suspende ba tinan 2. Entretantu defeza husu ba tribunál atu aplika pena multa ba arguidu.

Desizaun

Tribunál verifika ona iha Sistema baze de dados arguidu hetan kondenasau iha prosesu rua ne'ebé hetan pena prizaun no suspende nia ezekusaun maibé agora dadaun arkiva ona. Depoisde avalia faktu hotu, tribunál konsidera faktu hotu provadu mezmu arguidu hili direitu nonook maibé lezada konfirma ba faktu hotu.

Bazeia ba faktu provadu hirak ne'e tribunál konklui prosesu ne'e no kondena arguidu ho pena prizaun tinan ida fulan sia suspende ba tinan rua no apresenta-an periódikamente iha tribunál kada fulan dala ida durante tinan ida.

7. Krime ofensa ba integridade fízika simples ho natureza violénsia doméstika

Nú. Prosesu : 0190/23 PCCIC
Kompozisaun Tribunál : Singulár
Juis : Dra. Ana Paula Fonseca
Prokuradór : Dr. Napoleão da Silva Soares
Defeza : Dr. Manuel Amaral
Desizaun : Pena admoestasaun

Iha 20 Outubru 2023, Tribunál Judisiál Primeira Instánsia Dili prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu JAS hasoru nia feen, iha Minisípiu Dili.

Akuzasaun Prokuradór

Prokuradór akuza katak iha 23 Abril 2023, iha oras tuku 10:00 dadeer, lezada simu telefone husi mane seluk, arguidu husu lezada lakohi fó telefone tanba ne'e lezada halai ba toba iha nia kolega nia uma kalan ida no fila uma duni arguidu mak arguidu nervozu hodi tebe dala ida iha lezada nia reen-toos parte loos no rabat ba parede. arguidu nia aktu ne'e rezulta lezada sente moras no bubu iha reen-toos.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penal to'o tinan 3 ka multa no konjuga ho artigu 2, 3(a), 35 (b) no 36 LKVD.

Produsaun ba prova sira

Iha prosesu julgamentu, arguidu konfesa integralmente ba faktu sira iha akuzasaun no deklarara katak durante moris hamutuk foin primeiravés halo agresaun hasoru lezada, depoisde akontesementu di'ak malu kedas, la mosu tan problema to'o agora no arguidu foin primeiravés mai hatan iha tribunál.

Tribunál decide hodi la rona tan lezada nia deklarasaun tanba arguidu konfesa integralmente ba faktu hotu iha akuzasaun.

Alegasaun finál

Prokuradór haktuir katak arguidu konfesa integralmente ba faktu sira iha akuzasaun, arguidu nia aktu priense duni krime ofensa ba integridade fízika simple ho natureza violénsia doméstika

nune'e prokurador husu ba tribunál atu kondena arguidu ho pena multa. Entretantu perte defeza laiha opozisaun no konkorda ho prokurador nia alegasaun.

Desizaun

Depoisde avalia faktu sira hotu, tribunál prova katak arguidu komete duni krime hasoru lezada. Bazeia ba faktu provadu hirak ne'e no tetu mós ho sirkunstánsia atenuante sira hanesan depoisde akontesementu di'ak malu ona, la mosu tan problema to'o agora no arguidu foin primeiravés halo agresaun hasoru lezada nune'e tribunál konklui prosesu ne'e hodi kondena arguidu ho pena admoestasaun.

8. Krime ofensa ba integridade física simples ho natureza violência doméstica

Nú. Prosesu : 0045/23 DIBCR
Kompozisaun tribunál : Singulár
Juis : Dra. Ana Paula Fonseca
Prokurador : Dr. Napoleão da Silva Soares
Defeza : Dr. José da Silva
Desizaun : Pena admoestasaun

Iha 25 Outubru 2023, Tribunál Judisiál Primeira Instánsia Dili prezide leitura sentensa ba krime ofensa ba integridade física simples ho natureza violência doméstica ne'ebé envolve arguidu CSdC hasoru nia feen, iha Minisípiu Dili.

Akuzasaun Prokurador

Prokurador akuza katak iha 20 Marsu 2023, iha oras tuku 12:00 meiodia, arguidu tuku dala ida ho maka'as iha lezada nia inus kain parte leten rezulta naklees, raan sai no suku pontu rua no lezada konsege ba halo tratamentu iha PRADET. Konsekuénsia husi arguidu nia aktu ne'e rezulta lezada sente moras iha inus.

Prokurador akuza arguidu kontra artigu 145 KP kona-ba ofensa ba integridade física simples ho nia moldura penal to'o tinan 3 ka multa no konjuga ho artigu 2, 3(a), 35 (b) no 36 LKVD.

Produsaun ba prova sira

Iha prosesu julgamentu, arguidu konfesa integralmete ba faktu sira iha akuzasaun no depoisde akontesmentu di'ak malu ona, la iha tan problema ruma to'o agora no arguidu foin primeiravés mai hatan iha tribunál.

Tribunál deside hodi presinde lezada tanba arguidu konfesa integralmete ba faktu hotu iha akuzasaun.

Alegasaun final

Prokurador haktuir katak arguidu konfesa integralmete ba faktu sira iha akuzasaun nune'e arguidu nia aktu refere priense duni rekezitu krime ofensa ba integridade física simples ho natureza violência doméstica, nune'e prokurador husi ba tribunál atu kondena arguidu ho pena multa durante loron 30 no kada loron selu US\$ 1.00.

Entretantu parte defeza husu ba tribunál atu haree no tetu didi'ak arguidu nia kondisaun hodi aplika pena tuir arguidu nia kondisaun tanba arguidu konfesa integralmete ba krime ne'ebé imputa ba nia, arrepende nia hahalok no foin primeiravés mai hatan iha tribunál.

Desizaun

Depoisde avalia faktu sira hotu, tribunál prova katak arguidu komete duni krime hasoru lezada. Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, foin primeiravés mai hatan iha tribunál no arrepende nia hahalok nune'e tribunál konklui prosesu ne'e no kondena arguidu ho pena admoestasaun.

9. Krime ofensa ba integridade fízika simples ho natureza violénsia doméstika

Nú. Prosesu : 0126/22.DIBCR
Kompozisaun Tribunál : Singulár
Juis : Dr. Jose Maria
Prokuradór : Dr. Napoleão Soares da Silva
Defeza : Dra. Joana Cristina
Desizaun : Absolve

Iha 30 Outubru 2023, Tribunál Judisiál Primeira Instánsia Dili prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu GVGB hasoru nia aman, iha Munisípiu Dili.

Prokuradór akuza katak iha 26 Jullu 2022, iha oras tuku 16:00, arguidu lori ai-sar rohan baku dala ida iha lezadu nia ulun, maibé tanba lezadu satan netik ho liman nune'e ai -sar kona fali iha lezadu nia liman laran parte karuk. Antes agresaun ne'e, arguidu ho lezada diskute malu kona-ba lezadu hakilar ho lian toos ba arguidu nia inan nune'e arguidu hanoin katak lezadu atu baku ninia inan hodi arguidu hader hosi kuartu mai foti ai-sar baku kedas lezadu. Arguidu nia aktu ne'e rezulta lezadu sofre moras maka'as iha lezadu nia liman laran parte karuk.

Prokuradór akuza arguidu kontra artigu 145 nú 1 KP kona-ba krime ofensa ba integridade fízika simples konjuga ho artigu 2 3(c), 35 b no 36 LKVD ho moldura penal too tinan 3 ka multa.

Produsaun ba prova sira

Iha prosesu julgamentu, arguidu deklara parsialmente ba faktu iha akuzasaun, arguidu mós deklara katak nia laiha intensaun atu baku ninia aman, maibé nia hakarak sori ninia inan aman ne'ebé istoria malu hela, arguidu deklara mós katak ai-sar nia inan maka foti no kaer hela tanba diskuti malu hela ho lezadu, nune'e arguidu hader mai hadau ai-sar ne'e ho intensaun atu ninia inan la baku lezadu maibé arguidu hadau mak kona fali lezadu nia liman.

Alende ne'e lezadu mós deklara katak arguidu la foti ai-sar no la baku lezadu maibé arguidu hadau ai-sar hosi nia inan maka ai-sar kona iha lezadu nia liman, tanba ema haree nune'e polísia mai tula tia lezadu ho arguidu ba hatan iha Eskuadra Polísia Bekora.

Alegasaun finál

Prokuradór haktuir katak arguidu nega ba faktu sira no konfirma ho lezadu katak arguidu laiha intensaun atu baku lezadu nune'e husu ba tribunál atu deside justisa ba arguidu.

Enkuantu defeza haktuir katak arguidu deklara katak laiha intensaun atu baku nia aman maibé hakarak hakalma problema entre arguidu nia inan no aman tanba konfirma mós hosi lezadu katak ai-sar arguidu nia inan maka foti no kaer hodi arguidu ba hadau, nune'e husu ba tribunál atu absolve arguidu.

Desizaun

Depoisde avalia faktu hotu, tribunál konsidera katak arguida laiha intensaun atu baku ninia aman tanba arguidu konsidera lezadu nudar ninia aman rasik, no arguidu nudar oan mane boot ne'ebé sei kontinua hela estudo iha Universidade, nune'e tribunál konklui prosesu no absolve arguidu husi prosesu ne'e.

Atu hetan informasaun liután bele kontaktu:

Ana Paula Marçal

Diretora Ezekutiva JSMP

Email: ana@jsmp.tl

Telefone: 3323882 | 77040735

Website: <https://jsmp.tl/>